

Profesor dr. Manuel Veiga

“Futuro di humanidad ta definitivamente den mestisacion y criolidad”



ORANJESTAD - Dialuna anochi Instituto Pedagógico Arubano (Ipa) ta tene charla comunitario na Biblioteca Nacional Aruba tocante situacion linguistico na Cabo Verde. Sra. Marlen William kende ta traha na Instituto Pedagógico Arubano (Ipa) a fungi como anfitrión di e anochi aki y el a duna un caluroso bonbini na e orador principal di e charla aki.

Ta trata di Profesor dr. Manuel Veiga kende ta un PhD na e Universidad di Aix-en-Provence na Francia y ta profesor den linguística na Universidad di Cabo Verde (Uni-CV). Dr. Veiga a desaroya y ofrece diferente modulo na nivel academico y a publica diferente buki y articulo den area di linguística teoretico, descriptivo y Crioyística. Dr. Veiga ta haci investigacion continuo den cuadro di e lenga crioyo Caboverdiano, cu tin hopi parecido cu Papiamentu.

Den su charla, Profesor dr. Manuel Veiga, a duna un bista di e proceso di desaroyo



di e lenga crioyo Caboverdiano for di su nacemento te awendia, como tambe su desafionan pa futuro. Un punto cu a hala hopi atencion ta esun di desaroyo di e crioyo Caboverdiano. Cual su parecido cu nos realidad no ta puro coincidencia, ya cu e papiado di crioyo Caboverdiano a lucha y ainda ta luchando keto bay pa oficialisa su lenga materno. Te hasta cierto momento di nan historia, a cuminsa prohibi uzo na scol di e lenga Caboverdiano cu ta wordo papia pa mayoria di e hendenan cu ta biba na Cabo

Verde; y nan a cuminsa promove e uzo di Portugues. E ta un factor comun ya cu den nos pais ta existi un lucha di siglonan caminda Papiamentu na scol no tabata permiti.

No oficial

Encuanto standarisacion di idioma di Crioyo Caboverdiano e no ta oficialisacion ainda, segun Profesor dr. Manuel Veiga. Pero e ta institucionalisa di tal forma cu e ta di uzo comun na tur caminda hasta den comunicacion social, medianan di comunicacion, literatura, etc...E situacion di nan tabata mescos cu na Aruba prome cu 2003. Prome cu esey Papiamentu no tabata oficialisa ainda pero esaki no tabata nifica cu nos lenga materno no tabatin balor.

Ta existi otro punto comun entre Cabo Verde y Aruba riba tereno linguistico. Ta asina cu e linguistanan na Cabo Verde tabata propone un ortografia fonologico cu tabata facilita su siñamento; pero tin hendenan cu tabata contra, y ainda ortografia no a bira oficial.



Otro punto ta alfabetisacion cu nan ta trahando cu base fonologico. Ta asina cu a wordo crea un grupo special pa traha riba standarisacion caminda dr. Veiga ta forma parti di dje. Nan a propone ALUPEC y e proposicion aki a crea un reaccion mixto entre esunnan cu ta pro y otro cu ta contra. Pues hopi tempo prome cu e alfabet aki a wordo aproba pa gobierno. Desde 2009, alfabet di Caboverdiano a wordo institucionalisa y e ta conta pa henter Cabo Verde.

Mestisahe y criolidad

Durante su charla Profesor dr. Manuel Veiga a afirma un frase di un ex-presidente di Sennegal, y el a bisa cu “Futuro di humanidad ta definitivamente den mestisacion y criolidad”. E proceso di mestisacion ta evidente den nan pais, ya cu e Portuguesnan cu a establece na Cabo Verde tabata bay nan so. Esaki a haci cu nan aproxima e hende muhe nativo creando un comunidad caracteriza pa e mestisacion y e necesidad di comunicacion



comun. Awendia cu e globalisacion cu ta existi esaki ta mucho mas riparabel. Tur esaki danki na e uzo di internet y desaroyo impresionante di e medianan di comunicacion, segun dr. Veiga.

E anochi interesante aki a cera cu broche di oro, ya cu e publico presente por a disfruta di e creatividad y expresion artistico di Rosabel Ellis. E ta un hoben profesional cu actualmente ta haciendo su PhD den Psicologia na Universidad di Leiden kende a declama algun di su poesianan publica entre otro den su buki “Spiel di mi Alma”. □

